

## 1 TESALONIYANI

Polo'a Filipai taonifati'mo atalenuno Tesalonaika taonifi'mo mai'nenoa'e'mo Goti ge'amo aeno hakalo huno hapa pai'nige'apae'mo apaipamo ali'a afe le'nageno siosimo afole ai'niye. Yesu Kalaisife'mo apakesa afi'a fatago hu'naya'mofe'mo Yu nofi vaya'mogimo Polofe'mo kame hu'a ate'nageno ataleno Meliya kotegamo u'niye. Henaga'amo Timoti'a uno apaketeno siosi vaya'aife'mo apava gemo huno Polofe'mo ha pai'nigeno mani avo'mo kae'niye.

Polo'a Goti vaya'amo hamale'naya'mofe'mo Gotife'mo hao ke hege agai'amo ali'ya'mo ali'niya kavafe'mo ava gemo huge Kalaisi'a eminesiya kavafe'mo ava gemo huge huno mani avo'mo kae'niye.

<sup>1</sup> Polo'namogi Silivenisi'agi Timoti'agi huta Tesaloniyani siosi vaya'mogitapa afotimo Gotipi'e Ala kava netimo Yesu Kalaisipi'e'mo mai'naya vaya'mogitapae'mo mani avo'mo nekaone. Afotimo Goti'e Ala kava netimo Yesu Kalaisi'e'mo fiku lapa mae'ana lapami'anageno lapaipamo'mo falu hino.

*Tesaloniyani vaya'mogi apakesa afi'a fatago hute'a alagepa hu'a mai'naya apava gema.*

<sup>2</sup> Lagaemo muki'amogitapae'mo Gotife'mo muki afina'mo nunumu'mo huta hao ke nehone. <sup>3</sup> Lapakesa afita fatago hu'netapae'mo alagepa kava'mo nehae. Lapau lapayamopafi'mo lapau'nigetapae'mo lokiya ali'ya'mo ne'aliye.

Ala kava netimo Yesu Kalaisife'mo agava mai'netapa lapavayagunagu nehutapae'mo o'ataletapa atafauta alagi hutapa ne'maiye. Lagaemo Afotimo Goti aulagale'mo olapataleta ani kavatapie'mo muki afina'mo lagesamo ne'afitae'mo nunumu'mo huta nelapatone.

<sup>4</sup> Goti'a hau ayamopafi'mo hau'niya konagatimogitapae, huta, Goti'a agai'amo lekana paino lapate'niye, huta lapake'none.

<sup>5</sup> Alagepa faigoko ge'amo aeta hakalo huta lapa pai'nonageno'ae'mo lapaipafi'mo ge'age'mo afole o'ai'nifa himamu'a'e ge'aleti'mo ali'ya'mo aliteno alino afole aino ate'niye. Aote Auneme'aleti'mo lapa pai'nonagetapae'mo, he, lama gemo hane'niya gemo nehae, hutapa alagi lapakesa afita fatago hu'nae. Lapa maesunafe'mo lapakae'e'mo magokepi lokaeta mai'neta haiya kava huta ali'ya'mo ali'nopi huta ago lage'nae. Ani kava'mo lapakaetegamo afole ai'niya'mofe'mo Goti'a lekana paino lapate'niye, huta lapake'none.

<sup>6</sup> Goti ge'amo alagepa hutapa afitetapa lusi kava hutapa kanamo ali'nageno Goti Auneme'amo'mo lapa mae'nigetapa lapamogaga ne'aitapae'mo lakame huge Ala kava ne'mo akame huge hutapa mai'nae.

<sup>7</sup> Lapakaemo ani kava'mo nehutapae'mo lapakame hisaya agufa kava'mo apakesa afi'a fatago hu'naya vaya'mo Masetoniya kotega vaya'e Akaiya kotega vaya'e'mo ago alitapa apave li'nae.

<sup>8</sup> Ala kava ne'mo ge'amo lapakaeteti'mo Masetoniya kotega'e Akaiya kotega'eke'mo aino atagu faeno uneno osu'nifa

muki kotega'e'mo aino atagu faino uneno hu'nige'apae'mo lapakesa afitapa fatago hu'naya kavafe'mo ago lapava gemo afi'naya'mofe'mo mago'e huta hapa paisuna gemo ohane'niye. <sup>9</sup> Ani vaya'mogimo lagaefe'mo, apakaemo Tesaloniyani vaya'aitegamo u'nage'apae'mo aigofe goti'apimogi apatale'a ai'a afe le'a Gotitegamo e'a afa'a ne'maiya lama ge Goti ali'ya'amo ne'aliye. <sup>10</sup> Mai'ne'apae'mo Goti'a alino he tino ate'niya Mafa'ne'amo'mo Goti'a aipamo leno nelateya kayo'mo lamisiyategati'mo lagufamo alino katino nelateya Mafa'ne'amo koku'napati'mo eminesiyafe'mo agava ne'maiye, hu'a nehae.

## 2

*Polo'a Tesaloniyani vaya'aitegamo uno ali'ya'mo ali'niya kavafe'mo ava gemo hu'niya gemae*

<sup>1</sup> Konagatimogitapae, huta, lapakaemo ago lage'nayana lapakaetegamo uta mai'netae'mo afa ali'ya'mo o'ali'nopa ali'ya'mo ali'nonageno'ae'mo ne'ya'mo afole ai'niye. <sup>2</sup> Lapakaemo ago afi'nayana Filipai taonifi'mo nagae'e Silivenisi'e'mo u'no'age'a lusi kava hu'a la'amagi'naya'monanafa lapakaetegamo u'no'ae. La'agae'e Timoti'e'mo uta mai'nonageno Goti'a laha maeno lokiya vaino late'nige'apae'mo mago vaya'mogi lusi kava hu'a kame hu'a late'naya'monanafa koli osuta Gotitegati alagepa faigoko ge'amo aliniteta aeta hakalo huta lapa pai'none. <sup>3</sup> Lapa pai'nona gemo aigofe gefati'mo afole o'aige amega

lagufale'mo lamogaga aisuna agufa kavateti'mo afole o'aige humi'nami getileti'mo afole o'aige huno afole o'ai'niye. <sup>4</sup> Afole o'ai'niya'monanafa Goti'a lageno aeto huteno'ae'mo alagepa faigoko ge'ale'mo yagaita ate'neta ali'ya'amo alisunafe'mo lekana paino late'nigeta mai'none. Ali'ya'amo ne'aluna'mofe'mo vaya'mogi amuse hu'a latesaya agufa gemo osuta Goti'a laipafi'mo lageno alino fako huno nelateya vekamo'a amuse huno latesiyafeke'mo mani gemo nehune. <sup>5</sup> Lapakaemo ago afi'nayana aigofe gemo huta lahao ke hesayafe'mo huta lapao ke ose'none. Mago vaya'mogi hapa'ye nehiya kava'apile'mo ge'apileti'mo hu'a ae'a ati kaeya agufa gemo osu'none. Goti'a ago lage'niyanageno laha maesiya faigoko gemo afa'a hugiye. <sup>6</sup> Lagaemo lapakaemofi muki alu vaya'mogimofi hu'a lagitile'mo ali'a asaga hu'a latesayafe'mo mago kava'mo osu'none. Kalaisi apa vaya'amo mai'neta lokiya'amo ali'nona'mofe'mo lapakaefe'mo, ina ya'mo lamiyo, huta huge mani ali'ya'mo alitapa lateyo, huta huge hisuna agufa gemo afa'a hane'niya'monanafa lapa opai'none. <sup>7</sup> Lokiya gemo osuta lapakae'e'mo magokepi kanale huta lokaeta mai'netae'mo vase vase kava'mo nehuta a'nemogimo inamu mafa'nemo apanu ki'a alagi hu'a ne'maiya kava huta yagaita lapate'none. <sup>8</sup> Lapakaefe'mo lahau'niya'mofe'mo Gotitegati alagepa faigoko ge'age'mo alita lapamisunafe'mo osu'nopa lagufa'a'e'mo alita lapamisunafe'mo hu'none. <sup>9</sup> Konagatimogitapae, huta, alagepa faigoko

gemo aeta hakalo huta lapa paita mai'netae'mo laha maetapa kanamo o'alisayafe'mo feluga'e hani'ilaga'e'mo lokiya vaita ali'ya'mo ne'alunagetapa ago lage'nae. <sup>10</sup> Lagaemo lapakesa afita fatago nehaya vaya'mogitapa'e'mo lokaeta mai'netae'mo Gotitegamo alagepa kava'mo huge vaya'aitegamo alagepa kava'mo huge vai'mo olamisaya agufa kava'mo huge huta mai'nonagetapae'mo lapakae'e Goti'e'mo ago lage'nayanagetapa laha maesiya faigoko gemo afa'a hugae. <sup>11</sup> Afo'apimogimo mafa'ne'apile'mo yagai'a ne'apataya kava huta lapakaete'mo yagai'neta ani kava'mo hiyo, huta huge lapaipamo alita lokiya vaita lapatege lokiya gefati'mo lapa paige huta mai'nonagetapa lage'nae. <sup>12</sup> Goti'a yagaino ne'apateya kote'mo haitapa mai'netapae'mo ha le konali ya'amo alisayafe'mo keya aeno ge hu'niya vekamo'a hau'niya kava'mo hisayafe'mo lapakaetegamo ani kava'mo hu'none.

<sup>13</sup> Goti ge'amo lapa pai'nonagetapa afitetapae'mo, ma mopafi vaya'ai gemo ohane'nifa Goti ge'amo hane'niye, hutapa hu'naya'mofe'mo Gotifeke'mo hao ke hege hege huta mai'none. He, lapakaemo lama gemo hu'nae. Afi'naya gemo Goti ge'age'mo hane'niye. Mani gemo'a lapakesa afitapa fatago nehaya vaya'mogitapa lapaipafi'mo lokiya vaino ali'ya ne'aligeno'ae'mo ne'ya'mo afole ne'aiye. <sup>14</sup> Yutiya kotega vaya'mo Kalaisi Yesupi'mo mai'naya siosi vaya'mogimo kanamo ali'nae. Yu vaya'mo vaya'apimogi kanamo ali'a apami'naya kava hu'a vayatapimogi kanamo ali'a lapami'nae. Konagatimogitapae, huta,

ani kava'mo hutapa mai'netapae'mo Goti siosi vaya'amo apakame hutapa mai'nae. <sup>15</sup> Yu vaya'mogimo akeya'vilaga Gotitegati gemo alini e'a ae'a hakalo hu'a hapa nepaiya vaya'apimo kamiti apamagige Ala kava ne'mo Yesu'a kamiti amagige hute'apae'mo hemenimo lagaefe'mo apaini hu'a nelatae. Apakaemo Goti'a alagi ohau'niya agufa kava'mo nehu'apae'mo muki vaya'aife'mo kame hu'a ne'apatae. <sup>16</sup> Lagaemo Yu nofi vayapati o'mai'naya vaya'aife'mo ge hisunageno Goti'a apakufamo alino katino apatesiya ka'mo ali'a akani ne'malae. Muki afina'mo ani kava'mo nehageno'ae'mo hosu kava'apimo'a lusi kava huno havai te'niye. Goti'a apakava mai'niya'monanafa hemenimo aipamo leno ne'apateya kayo'mo apami'niye.

*Polo'a, lapakaefe'mo halate u'na lapakegefe huve, huno hu'niya gemae*

<sup>17</sup> Konagatimogitapae, huta, vaya'mogimo ali'a laha faitalageta lapataleta aise afina'mo laote mai'nona'monanafa lapakaefe'mo lagesamo afita ne'maune. Halate lapakaefe'mo uta lapakesunafe'mo lusi kava huno lahau'nigeta uta lapakesuna kafe'mo layamukiki huta kahauya nehune. <sup>18</sup> Lapakaetegamo ugefe nehutae'mo nagaemo Polo'namo alu afina alu afina'mo ugefe hu'novana Satani'mo ka akanino late'niye. <sup>19</sup> Ala kava netimo Yesu Kalaisi'a eminesiya afinafe'mo agava mai'neta lavayagunagu huge lamogaga aige miyatimo alisunafe'mo lamogaga aige nehuna kava'mo aepa vaya'mo ina lagiye. Lapakaitapigemae. <sup>20</sup> Kalaisi aulagale'mo

mai'netae'mo lapakaeteti'mo ala lagitimo aliteta lamogaga aigune.

### 3

<sup>1</sup> Lapakae'e'mo o'mai'nona'mofe'mo laipamo'mo kana hu'nigeta lagesamo afitae'mo mago'e huta afa'a o'maigune. Mani Atenisi taonifi'mo mai'neta'ae'mo <sup>2</sup> Timoti'mo alita'a atesu'ageno uno lapakegaiye, huta'a hu'no'ae. Agaemo lagae'e'mo magokepi lokaeno ali'ya'mo ne'alino Kalaisife'mo alagepa faigoko ge'amo aeno hakalo huno hapa nepaiya konagatimo'mo mai'niye. Lapa maeno alino lokiya vaino lapatesigetapa mago'e hutapa lapakesa afita fatago hisayafe'mo alita'a ate'no'ageno u'niye. <sup>3</sup> Fiku yanage'a kanamo ali'nona'mofe'mo mago vaya'mo asagau'a aigae. Lapakaemo ago afi'nayana Goti'a lagaefe'mo, ani kanamo afa'a aligae, huno agesamo afino hu male'niye. <sup>4</sup> Lapakae'e'mo hogoteta mai'netae'mo ina ge hutae'mo, kanamo aligune, huta lapa pai'nona agufa kanamo ali'nonageta ago lage'nae. <sup>5</sup> Ani kavafe'mo nahausoli hu'nige'nae'mo, mago'e hu'na afa'a o'maiguve, hu'na hute'na Timotife'mo, apakesa afi'a fatago nehafigi uka apako, hu'na ha pai'nove. Satani'mo apamalageka huteno ali'yatimo alino hano huno atale'nisifi, hu'na lusi kava hu'na koli hu'na ali'na ate'nogeno u'niye.

*Timoti'a halate aino atagi neneno alagepa apava gemo laha pai'niye, huno hu'niya gemae*

<sup>6</sup> Hu'nova'monanafa Timoti'a lapakaetegati'mo halate aino atagi neno lagaetegamo eno'ae'mo alagepa lapava gemo laha paino'ae'mo, alagepa hu'a apakesa afi'a fatago nehu'a hapau apayamopafi'mo nehapaiye. Lagaemo apakesunafe'mo nehuna kava hu'a lagaefe'mo alagepa hu'a apakesamo ne'afi'a lagesayafe'mo nehae, huno laha pai'niye. <sup>7</sup> Konagatimogitapae, huta, kanamo alige lagafu kige huta mai'nonageno'ae'mo lapava gemo huno laha paino'ae'mo, alagepa hu'a apakesa afi'a fatago nehae, huno laha pai'niya gemo'a laipamo alino lokiya vaino late'nigeno laipamo'mo falu hu'niye. <sup>8</sup> Lapakaemo Ala kava nepi'mo mai'netapae'mo o'ataletapa atafautapa alagi huta mai'nisaya'mo'mo alagi alagepa huta ne'maune. <sup>9</sup> Goti aulagale'mo lamogaga aige aige huta mai'netae'mo lapakaetefe'mo lamogaga ne'auna kavatefe'mo alagepa huta Gotife'mo afa'a hao ke oseta haita ohapaigune. <sup>10</sup> Lagaemo uta lapa maeta lapakesa afita fatago hu'naya kavatapimo alita kosita atesunafe'mo muki afina'mo feluga'e hani'ilaga'e'mo laipafi'mo nunumu'mo huta nelapatone.

<sup>11</sup> Afotimo Goti'e Ala kava netimo Yesu Kalaisi'e'mo uta lapakesuna ka'mo vali'ana latesa'ageta visunafe'mo lahau'niye. <sup>12</sup> Ala kava ne'mo'a lapa maesigetapa mago'e huno lusi kava huno lapau lapayamopafi'mo lapaino. Lagaemo lapakaefe'mo lahau layamopafi'mo lahau'niya kava huno konagatapimogi'e muki vaya'efe'mo lapau lapayamopafi'mo lapaino. <sup>13</sup> Ala kava ne'mo'a ani kavateti'mo lapa maeno lokiya vaino



lapatenagetapa Ala kava netimo Yesu Kalaisi'e muki vaya'amogi'e'mo eminesiya afina'mo Afotimo Goti aulagale'mo hosu kavatapimo ohanesigetapa alagi alagepa hutapa maigae.

## 4

*Goti'a hau'niya kavafe'mo ava gemo hu'niya gema*

<sup>1</sup> Inagi konagatimogitapae, huta, lagaemo Goti'a hau'niya kava'mo hutapa maisayafe'mo alita lapaya male'none. Ani kava hutapa mai'nae. Hemenimo Ala kava ne'mo Yesuteti'mo lokiya gefati'mo lapao ke hetae'mo, mago'e hutapa alagepa kava'mo hutapa maiyo. <sup>2</sup> Ala kava ne'mo Yesuteti'mo mani kava'mo hiyo, huta hu'nona gemo ago afi'nae. <sup>3</sup> Goti'a lapaote kava'mo hutapa kumai kavafe'mo maita halove hutapa atesayafe'mo hau'niye. <sup>4</sup> Lapakaemo Gotitegamo alagepa kava'mo huge vaya'aitegamo alagepa kava'mo huge nehutapae'mo lapamete lapamete hutapa atapimo aliyo. <sup>5</sup> Malaga vaya'mogi Goti'a o'age'naya vaya'mogimo apakufamo'mo hau'niya agufa kava'mo hu'a hapa'ye nehige'apae'mo a'mo ne'aliya kava osiyo. <sup>6</sup> Ani kavatefe'mo fiku yanage'a mago vaya'mogi konaga'apimogife'mo humi apatete'a ali'a hosu hu'a apategae. Hogoteta, Ala kava ne'mo'a kumai kava'mo anona'apilefe'mo apamigiye. Ehetapiye, huta ago lapa pai'none. <sup>7</sup> Ani kavatefe'mo Goti'a kumai hegekana agufa kava'mo hisunafe'mo keya o'ae'nifa laote

alagepa kava'mo hisunafeke'mo keya ae'niye.  
<sup>8</sup> Keya ae'niya'mofe'mo mani gemo o'afi'naya  
 vaya'mogimo ma mopafi vaya'aina apakame'ya  
 no'apamifa Auneme'amo lami'niya Gotike'mo  
 apakame'ya ne'amiye.

<sup>9</sup> Goti'a konagatapie'mo lapau la-  
 payamopafi'mo lapausiyafe'mo ago alino  
 lapaya male'nigetapa afi'nayanageta  
 lapaisiyafe'mo halate avo'mo kaesuva  
 kava'mo ohane'niye. <sup>10</sup> He, lapakaemo muki  
 Masetoniya kotega mai'naya konagatapie'mo  
 lapau lapayamopafi'mo lapau'niya'monanafa  
 konagatimogitapae, huta, lapao ke hetae'mo,  
 mago'e mago'e huno lapaino, huta nehune.  
<sup>11</sup> Alagepa huta vase huta maigune, hutapa  
 lapakesamo ne'afitapa lapakaitapi yate'mo  
 alagepa hutapa yagaitapa ate'netapa ali'ya'mo  
 aliyo, huta ago lapa pai'none. <sup>12</sup> Malaga  
 vaya'aitegamo alagepa kava'mo hutetapa kafu  
 osisayafe'mo ali'ya aliyo.

*Ala kava ne'mo halate eminesiya kavafe'mo  
 hu'niya gemae*

<sup>13</sup> Inagi konagatimogitapae, huta, mago  
 vaya'mogimo, fali'naya vaya'mo he otigae, hu'a  
 apakesamo ne'afiya'mofe'mo apakava o'maige  
 apavayagunagu osuge hu'a lusi kava hu'a  
 yulagefa ne'aiye. Ani agufa kava'mo osutapa  
 fali'naya vaya'aife'mo lama gemae, hutapa  
 afisayafe'mo nahau'niye. <sup>14</sup> Lagaemo, Yesu'a  
 ago faliteno he ti'niye, huta lagesa afita fatago  
 nehuna'mofe'mo Goti'a Yesupi'mo fali'naya  
 vaya'e Yesu'e'mo apavalelino eminegaiye,

huta lagesa afitā fatago hugune. <sup>15</sup> Ala kava ne'mo'a, afa'a mai'naya vāya'mogimo fali'naya vāya'aina apatale'a hai'a hogo otegae, huno laha pai'niye. <sup>16</sup> Ala kava ne'mo koku'napati'mo emine'ne'eno'ae'mo alopa gefati'mo keya aeno ge nehisigeno'ae'mo enisole vāya'aite'mo yagaino ne'apateya enisole vekamo'a ge nehisigeno'ae'mo Goti pikulimo nehisigeno agai'amo eminegaiye. Emine'ne'esige'apae'mo Kalaisipi'mo mai'ne'a fali'nisaya vāya'mo hogote'a he tige. <sup>17</sup> He netisageno'ae'mo agaemo afa'a mai'nona vāya'e'mo lavalesigeta apakaegi'e'mo magokepi lokaelita haita hiyapi'mo Ala kava ne'e'mo fotu huteta muki afina'mo agae'e'mo maige maige huta maigune. <sup>18</sup> Maiguna'mofe'mo mani geleti'mo konagatapimogi apaipamo alitapa falu hutapa apateyo.

## 5

*Ala kava ne'mo eminesiya'ae'mo alo huta maigetāo, huno hu'niya gemae*

<sup>1</sup> Konagatimogitapae, huta, hainu afina'mo afole aisifi hainu afina'mo eminesifi huta ani kavafe'mo avo'mo kaesuna gemo alagi ohane'niye. Lapakaemo ago afi'naya'mofe'mae. <sup>2</sup> Ago afi'nayana kava no'yagaiya hani'ilagamo kumaya vāya'mo ne'aya kava huno Ala kava ne'mo afina'amo afole aigiye. <sup>3</sup> Vāya'mogi, alagepa huta ne'maunanageta ani kavake'mo huta maigune, hu'a nehisageno'ae'mo malage huno hosu kava'mo apakaetegamo afole aitenō

alino hano huno apategaiye. A'nemogimo mafa'nemo ali'a apategefe nehaya afina'mo fiku mai'nageno'ae'mo apakafu nekiya kava'mo malage huno afole aisige'apae'mo ae'a kasalo opaegae. <sup>4</sup> Konagatimogitapae, huta, ae'a kasalo opaegaya'monanafa kumaya vaya'mo ne'age'apae'mo hapau ne'aiya kava hutapa lapakaemo hanipi'mo no'maiya'mofe'mo ani afina'mo lapakaetegamo afole aisigetapae'mo lapau o'aigae. <sup>5</sup> Lagaemo hanipi'mo o'maige hani'ilagamo umenitata nehaya vayakana huta o'maige huta mai'none. Muki'amogitapamo ha le yategamo mai'netapa felugamo umenitata nehaya vayakana hutapa mai'nae. <sup>6</sup> Mai'nona'mofe'mo mago vaya'mo apau kale'a ne'maiya kava huta lagaemo lau kaleta o'maita laipa lagesale'mo yagaita lateteta maigetao. <sup>7</sup> Apakaemo hani'ilagamo apau kalege hani'ilagamo ani'mo nete'a negi malege hu'a ne'maiya'monanafa <sup>8</sup> lagaemo feluga umenitata nehaya vayakana huta laipa lagesale'mo yagaita lategetao. Ati vaya'mogimo kame vaya'apimogimo ohapaesayafe'mo lokiya aeni siotimo ali'a ne'vaiya kava huta lagesa afita fatago nehuta lahou layamopafi'mo lahaino. Ati vaya'mogi lokiya aeni kakolitamo ali'a ne'malaya kava huta Goti'a lagufamo alino katino latesiyafe'mo agava mai'neta lavayagunagu huta maigetao. <sup>9</sup> Goti'a aipamo leno lateteno kayo'mo lamisiyafe'mo lekana paino olate'nifa Ala kava netimo Yesu Kalaisiteti'mo laha maesiyafe'mo lekana

paino late'niye. <sup>10</sup> Falitesunageno eminesifi afa'a mai'nisunageno eminesifigeta agae'e'mo magokepi lokaeta maisunafe'mo falino late'niye. <sup>11</sup> Hu'niya'mofe'mo lapakaemo nehaya agufa kava'mo hutapa konagatapimogimo mago'e hutapa hapa maetapa apaipamo alita lokiya waitapa ne'apatetapa alita falu fala hutapa apateyo.

### *Ge atupa gemae*

<sup>12</sup> Konagatimogitapae, huta, lapao ke honanagi lapakae folagapi'mo ali'ya alige yagai'a lapatege ali'a api ai'a lapatege hu'a ne'maiya vaya'aife'mo, lagae kava vayatimo mai'nae, hutapa apakaefe'mo alagepa hutapa lapakesamo afiyo. <sup>13</sup> Goti ali'ya ne'aliya'mofe'mo alagepa vaya'mo mai'nae, hutapa apakaefe'mo lapau lapayamopafi'mo lapaino. Magoke lapaipa lapakesamo alitetapa magokepi lokaetapa maiyo. <sup>14</sup> Konagatimogitapae, huta, lapao ke honanagi alaga nehapaege'a afa'a ne'maiya vaya'aife'mo, ehetafiye, alaga olapaeno, hutapa hapa paiyo. Koli nehaya vaya'ai apaipamo alita lokiya waitapa apateyo. Lokiya no'vaiya vaya'aina hapa maeyo. Muki vaya'aitegamo vase vase hutapa falu fala kava'mo hiyo. <sup>15</sup> Vaya'mogi hosu kava'mo anona'apilefe'mo ae'a atagaina hu'a osisayafe'mo alagepa huta yagaitapa apateyo. Lapakaemo muki afina'mo konagatapimogitega'e muki vaya'aitega'e'mo lapayamukiki hutapa alagepa kava'mo hiyo. <sup>16</sup> Muki afina'mo lapamogaga aiyo. <sup>17</sup> Muki afina'mo o'ataletapa nunumu'mo hiyo. <sup>18</sup> Muki

agufa agafa kavatefe'mo Gotifeke'mo hao ke heyo. Kalaisi Yesupi'mo mai'netapae'mo ani kava'mo hisayafe'mo Goti'a hau'niye. <sup>19</sup> Goti Auneme'amo'mo ata legekana huno ali'ya'mo ne'aliyanagi aetapa yu oseyo. <sup>20</sup> Ani kavatefe'mo vaya'mogimo Goti Auneme'aleti'mo lapa nepaiya gee'mo ina agufa gemo nehae, hutapa osiyo. <sup>21</sup> Osutapa muki kava'e ge'e'mo alita fako hutapa atege afige nehutapa alagepa kava'e alagepa ge'e'mo atafauta alita lapaipafi'mo maleyo. <sup>22</sup> Muki agufa agafa hosu kava'amo maita halove hutapa ateyo.

<sup>23</sup> Goti'a agae'e'mo magokepi alino lokaeno lateteno laipamo alino falu huno nelateya vekamo'a alino alagepa huno lapate'niyanagi alagi lapaoteke'mo maiyo. Agaemo muki lapaunelapametenagi lapaipa lapakesalenagi lapakufalenagi huno yagaino lapate'nisigeno Ala kava netimo Yesu Kalaisi'a eminesiya afina'mo mago hosu kavatapimo ohane'nisigeno vai'mo olapamino. <sup>24</sup> Lapakaefe'mo keya aeno ge hu'niya vekamo'a agai'a avayafati'mo hu'niya ge'amo akame nehiya'mofe'mo ani kava'mo afa'a hugiye. <sup>25</sup> Konagatimogitapae, huta, nunumu'mo hutapa lateyo. <sup>26</sup> Muki konagatapimogimo alita falu fala hutapa ne'apatetapae'mo lapaote lapaipamo kali'netapa hapaetapa neyo. <sup>27</sup> Nagaemo Ala kava ne'mo himamu'aleti'mo hu'nae'mo, mani avo'mo alita lekana paige'apao muki apaote konagatimogi afiyo. <sup>28</sup> Ala kava netimo Yesu Kalaisi'a fiku lapa maeno lapaminagetapa maiyo. He, lama gemo.

**Saufa Kotalake Gemae**  
**The New Testament and Portions of the Old**  
**Testament in the Keyagana Language of Papua New**  
**Guinea**  
**Sampela hap Buk Baibel long tokples Keyagana long**  
**Niugini**

copyright © 2001 Wycliffe Bible Translators, Inc.

Language: Keyagana

Translation by: Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-26

---

PDF generated using Haiola and XeLaTeX on 21 Feb 2024 from source files dated 31 Aug 2023

dec78c50-71b7-5d19-97bf-bf625abcf44